


Na encargo di drs. Raymundo Dijkhoff

# Lectura impactante awe encuanto descubrimientonan arqueologico haci den awanan teritorial di Aruba



**ORANJESTAD (AAN):** Awe Diahuebs, e arqueologo local drs. Raymundo Dijkhoff lo bay ta ofreciendo un lectura cu ta forma parti di un ciclo di charla cu ta enfoca principalmente riba e Joyanan di e Herencia Arqueologico Sub-Aquatico.

Ta asina cu hopi hende ta costumbra cu e descubrimientonan arqueologico riba tera, pero hecho ta cu Aruba tin hopi den su awanan teritorial y e awanan cu tin paden di e isla. Pasobra tin di corda cu e ser humano di tur epoca, semper tabatin un relacion cu awa.

E desaroyo di e disciplina aki di arqueologia awor ta acelerando, y Aruba tambe ta participando den esey pa basta aña caba, pero awor e momento a yega pa cumenza divulga tur loke a bin haya sa.

E motibo pa esaki, ta debi cu Reino Hulandes completo desde 2019 tras di cortina ta trahando pa asina e fin di 2022 pa comienzo di 2023, e ratifica e Tratado di UNESCO di 2001, cu ta encera un convenio pa cu proteccion di herencia sub-aquatico. Tin 70 pais rond mundo cu ya caba a ratifik'e, pero

Aruba mes no por haci esey. (E isla ta un 'associate member' di UNESCO). Pues ta Hulanda tin di keda encarga cu esey.

Segun drs. Dijkhoff, na aña 2019 a logra convence Hulanda pasobra tabatin cierto motibo logistico y parti legal cu na comienzo tabata un estorbo pa esey socede. Pero awor e caminda ta hanchu habri pa ratifica e Tratado di UNESCO numa.

Den cuadro di esey, awor e expertonan kier bay concientiza pueblo Arubiano. Esaki ta encera legislacion cu tin di bin, y maneho cu mester wordo imponi riba e area aki.

Ademas, e enfoke lo no djis bira di e descubrimientonan arqueologico riba tera, pero tambe di loke tin den lama. Aña paa mes cu a haci un investigacion den awanan di Aruba, a bin descubri 100 lugar arqueologico den awanan teritorial. Segun Dijkhoff, e tabata un investigacion basta grandi y na October 2022 lo bay divulga tur e detaye di esey.

Den su lectura di awe Diahuebs, drs. Raymundo Dijkhoff lo duna informacion di e desaroyo di añanan 1940 te cu aworaki na

Aruba di tur loke a ser haci cada decada, kico a wordo haya, con e maneho a ser haci, y con e desaroyo ta te cu awor. Asina esnan presente lo haya full un bista di e rikeza increíble cu Aruba tin den e parti aki. Pero ta dificil pa trece afo, como cu no tin e cuadro legal pa proteccion.

Un persona cu semper ta adora su cultura y identidad, tin di percura tambe pa vigila y sigui e historia di bo pais. Y arqueologonan ta investiga e restonan di e cultura material di pasado. Esey kiermeen cu ta haci esey riba tera y den awa, y na final semper e ta beneficioso pa bo pais, pa asina enriquece conocimiento. E ta enriquece informacion di cultura, pa bo compronde kico a socede den pasado, y cu bo por adapta pa use den futuro.

Loke ta fenomenal ta cu tur esaki ta ponebo haya informacion, cu ademas cu Aruba mes ta 90 pa 95 miyon aña bieu geologicamente, y cu tin rasa di ser humano cu ta 1.500 aña prome cu Cristo na Aruba, cu ta bay haya sa awor kico tur a wordo haci den nos awanan, cu ta bay duna un empuhe aun mas grandi di nos conocimiento di e pasado di e isla, y cu ta bay engrandecere cultura. Por hasta usa e beneficio di esaki, via di legislacion, pa e bira un promocion turistico-economico tambe.

**Invitacion pa esnan interesa:** Segun drs. Raymundo Dijkhoff, esnan cu sigur lo bay haya e informacionnan aki fascinante, lo ta esnan cu ta interesa den e topico. Tambe e ta spera di ricibi hendenan cu tin di haber cu actividad

of interes aquatico. Aki ta pensa riba e buceadornan, e piscadornan, y tur compania cu ta haci actividad economico riba awa, departamentonan concerni manera Directie Scheepvaart, Fundacion Parke Nacional Aruba, Ministerio di Cultura, sigur lo mester ta presente na e lectura aki.

"En general mi ta invita tur hende, pasobra mi ta sigurabo cu boso ta bay mira algo cu boso no tabata sa, y cu hunto nos ta desea pa cumenza desaroya y preserva," drs. Dijkhoff a bisa.

E lectura lo ta den Auditorio di Museo Arqueologico, awe Diahuebs 15 di September 2022 for di 7:30 pm te cu 9:00 pm. Ta pidi pa dreña via e porta di hardin den Emanstraat, y e lectura ta gratis.